

序

我出雲州之事載史乘者甚少矣蓋因其僻在西隅之故乎何其直傳而久不傳也夫全州且然況於廣瀨一部落乎廣瀨之

事見於書冊者除出雲風土記之外有友人桃節山所著出雲

私史而已然其書皆管出雲全州則其畧於廣瀨可知也其詳

於廣瀨者寥寥乎有一富田軍實記而亦唯錄軍事而已至於

軍前之事則不載况於軍後之事乎且彼固兵書耳主喜人之


心自故多遺於文飾者因是觀之廣瀨之事迹殆將絕而不傳

也夫廣瀨之為邑雖蕞爾小部落近古尼子氏所據而有十餘

州其要害沃饒可推而想焉爾來數百年我舊君松平公國此

者赤累葉古今沿革時勢盛衰不記而錄之為憾果如何頃山

口兄君從著廣瀨志一日懷而來示余余披而閱之辭簡而意





達文略而旨深事主確實不飾篇幅且間多土人所不知者凡方土之事網羅無遺可謂麻姑瘙痒矣嗟夫苟無地誌他州之人不能知其土如何不獨他州人雖本土之人亦不能也自今之後其眼之人皆得審之而雖及千萬世之久亦不絕也豈不廣瀨之大幸乎君從之功於是乎為大余聊冠一言於卷首以表其功

明治三十一年戊戌陽月

勉齋學人山村良行

凡例

一余每暇日。跋涉山川。探討舊跡。訪古老。閱古記。隨得隨錄。積為一卷。乃置之坐右。以自便參觀。門人觀之。曰此書撥揮鄉事者多矣。請公之。余曰。是出於余研讀文章之餘。固非可視他人者。且公之。宜用國文。何以此佶屈贅牙為。曰生等在此鄉。病不能知鄉事者久矣。此書出。則百戰陣跡。二百年藩治。可以窺一斑矣。亦何論字之真假。余感其志。乃畧分部類。而授之。其他日推演之。使人人瞭然心目者。吾不汝禁也。

一題曰廣瀨志。而傍出入近境者。以日常所見聞不可不知也。

一紀中時雜奇談異說。大闕叙事体裁者。亦以其係研鑽之餘也。讀者諒焉。

一人名概直指斥之間。或用通稱雅號者。以其不審也。而係舊



藩公及越前諸家者。特殊稱謂。亦私選之体。自不得不然也。  
 一余久在鄉校。歸家又常爲童子輩所責。以故不能博引旁搜  
 盡事之終始。疎漏殊甚。讀者幸勿吝指教。

明治三十一年戊戌十二月識廣瀨鄉校南窓下

習堂學人山口美道

廣瀨志目錄

地勢第一

藩侯第二

法雲公 瑞岸公 圓德公 瑞雲公 成覺公  
 本源公 本覺公 德壽公 成德公 正四位公

郡長第三

矢野勉 若槻敬 田中知邦  
 正木芳介 猪股定重

舊藩文武第四

皇學 漢學 洋學 醫學 算術 習字 兵學 弓術  
 馬術 槍術 劍術 銃砲 柔術 拳法 洋式銃隊

今世公私學館第五

尋常小學校 高等小學校  
 修文館

技藝第六

畫工 木工 金工 陶工 鋸工  
 織工 乾菜 髮膏 製糸



社寺第七

八幡宮本子社 都辨志呂神社 嘉羅久利神社 大歲神社  
 金刀毘羅神社 勝日高守神社 少童神社 十二所神社 廣島神社  
 稻荷神社 山神社 美加佐神社 金屋子神社  
 大夫神社 小山神社 蛭子神社  
 洞光寺 勝願寺 速效寺 岩倉寺 成安寺 宗松寺  
 誓願寺 本成寺 清水阪寺 十王堂 一條院

勝跡古墳第八

月山 矢中松 天馬鼻 蛇岩 經塚 尼子經久墓 新宮熾墓  
 堀尾吉晴墓 堀尾忠氏墓 毛利元秋墓 堀尾河內守父子墓  
 品川大膳墓  
 石室


戶口第九

雜事第十

古川温泉 盤谷銀礦 享保狂狽 寬政大火 享和大雪  
 天保飢饉 嘉永地震 與利太水

廣瀨志

雲州廣瀨 山口美道 編



地勢第一  
 寬文六年丙午四月。我藩祖法雲公始受封於此。其秋大水。飯  
 梨川東決。漂沒富田市街。乃起工河西。闢草萊。治水土。興新  
 館。列邸宅。就而治焉。凡其經營。皆出左乙女三郎兵衛之區  
 畫矣。廢藩之時。島根縣權參事山口通貫來觀之。稱其結構  
 云。而時月漸遠。規模隨變。恐至不可考據。因錄舊所見聞。而  
 後及今時如左。

廣瀨在雲州能義郡飯梨川西。往昔蓋屬飯梨鄉。後屬富田庄。  
 及松平氏經營治所。而後稱廣瀨藩。正東對月山。左右望大連。



獨松山。北負龍山。京羅縉山。西南有三笠駒返等諸山。地勢高於西南。而卑於東北。祖父谷目谷二川。東流三分全街。戶數殆一千。人口稱之。戶口詳下文實爲十世二百有六年間之治所矣。公館殆在區內中央。爲成安寺舊境。以嘗再罹火災。久爲假館。規模隨小而至。嘉永三年。成德壽公准城主。明年成德公始就封。而大成焉。正門向東。後門向西。南有屏重門。以充軍事往來。北有作事門。民庶所出入。有正廳。有便室。有執政度支內外事務。監察軍事諸局。以至倉庫武庫鼓樓馬廐作場連房。莫不悉備焉。門櫓堅牢。屏牆圍繞。而東南一帶鑿濠塹。以防兵寇焉。屏重門美。爲操練場。北有紅葉馬場。以兩堤植楓樹。名焉。東有水田。藩候親臨。以知稼穡之艱云。城內結構大略如此。正門前沿濠地。爲武者屯。俗謂之勢溜。東出則屹然相對門者。南爲片山氏。

北爲鈴木氏。俱爲藩祖以來元老。二第東側一大巷陌曰中丁。左其東側。對鈴木氏後門者。爲矢野氏。初內藤氏居之。後中丁半途東折。夾一路者。北爲朝比奈岩崎兩氏。南爲加藤。初天野。後水安井。初佐川神山氏居之。兩氏以上數氏。概爲執政參政巨室焉。其餘兩下丁二橫丁石橋祖父谷目谷等。皆列士所宅。而步卒則隔在西北兩部。謂之上部下部。藩學校槍劍場弓馬柔體銃砲諸術場。散在各所。常獎厲文武焉。市街橫絕南北者。分爲新坊。後坊表裏及上坊下坊。八軒家。屬之。中坊。魚坊。四軒。鍛冶坊。有裏。新市坊萱坊八坊。置揭示場於中坊。牢獄於下坊。秦池田二氏在新坊。斜相對爲著姓。而藩中與市街。限以柵門。設邏所。誰可。俗謂之大手口。蓋前門之謂也。自大手口而登。則衢路廣濶。大廈整列。不復見塵埃。漸向勢溜。仰望公館。則壯偉宏耀。隱



顯於老松樹間。始至者。以爲十萬石侯之城下云。  
廢藩之後。姑爲廣瀨縣。不幾合於島根縣。後嘗割舊館中一隅。  
置松江師範學校。尋爲本郡中學校。而皆相繼而廢。方今則  
合全街及廣瀨富田祖父谷町帳諸村。稱廣瀨街。設郡廳於舊  
館中。以管全郡。置高等小學校於舊勢溜。尋常小學校及街署  
於鈴木氏邸。稅務署於朝比奈氏邸。警察分署於中坊。郵便電  
信局於上坊。松江裁判所支署於新坊。以各統轄其所部。又有  
製絲場織工場。而各從事其職。抑此土。廢藩之後。大宅廣廈。多  
荒廢爲田園。而近時頻修道路。通橋梁。架電線。起會社。以計其  
擴張云。

### 藩侯第二

我廣瀨藩。爲松江藩之支封。初宗藩祖高眞公欲割管內五  
萬石以封我公。老臣有異議而止。及寶山公嗣。更具狀請之。  
幕府而見允。遂起館以治焉。而未定封土。假給廩米。後以能  
義飯石兩郡各一萬五千石。爲提封。世領之。第八世德壽公  
以勤勞。准城主。以世其家。至第十世正四位公。與宗藩奉還  
版籍。而爲藩知事。尋會廢藩而止。其世系如左。

太祖法雲公 諱近榮。小字大助。源姓松平氏。宗藩高眞公

第二子。而越前淨光公孫。於東照公爲曾孫。母夫人松平氏。

甲斐守源忠良女。以寬永九年壬申九月。生於宗藩赤阪本邸。

承應元年壬辰十二月。叙從五位下。任上野介。寬文六年丙午四

月。始封於廣瀨。食三萬石。在職三十七年。元祿十五年壬午三



月致仕。歸藩者七。享保二年丁酉九月卒。年八十六。葬東都麻生祥雲寺子院靈泉院。

二世瑞岸公 諱近時。小字大助。法雲公嫡子。母夫人松平氏。明石藩祖松巖公女。以萬治二年己亥四月。生於宗藩貝阪別邸。延寶三年乙卯十二月。叙從五位下。任式部少輔。元祿十五年壬午三月。襲封。在職僅七閱月。未歸藩。閏八月卒。年四十四。葬東都西窪天德寺。

三世圓德公 初諱近信。後近朝。小字安次郎。又大助。後改兵庫。瑞岸公嫡子。母夫人松平氏。宗藩寶山公女。以天和元年辛酉六月。生於市谷本邸。元祿十五年壬午十月。襲封。十二月。叙從五位下。任隼人正。後遷飛驒守。在職二十七年。歸藩者九。享保十三年戊申十一月卒。年四十八。葬天德寺。

第四世瑞雲公 初諱近房。後近明。小字龜之助。又玄蕃。後

改大藏。瑞岸公第四子。母妾大竹氏。以元祿十五年壬午八月。生於市谷本邸。享保十三年戊申十二月。爲圓德公嗣。襲封。其十四年己酉十二月。叙從五位下。任肥前守。尋任式部少輔。後又遷近江守。在職二十二年。寬延二年己巳八月致仕。號猪寬。歸藩者一。寶曆五年乙亥四月卒。年五十四。葬天德寺。

第五世成覺公 諱近輝。小字多一郎。後式部。瑞雲公長子。母准夫人柳田氏。以享保十五年庚戌七月。生於大窪別第。寬延二年己巳八月。襲封。十二月。叙從五位下。任式部少輔。在職九年。未歸藩。寶曆七年丁丑五月卒。年二十八。葬天德寺。

第六世本源公 初諱近峯。後近貞。小字麟三郎。又大藏。瑞雲公第三子。母准夫人柳田氏。以享保十八年癸丑九月。生於



大窪別第。寶曆七年<sub>丑</sub>七月爲成覺公嗣。襲封。十二月叙從五位下。任淡路守。在職十七年。安永二年<sub>巳</sub>十一月致仕。號大內記。歸藩者一。天明五年<sub>乙</sub>九月卒。年五十三。葬天德寺。第七世本覺公。初諱長善。又近義。後改直義。小字久松。又主稅。津山隆照公第二子。母夫人藤堂氏。和泉守高豐妹。爲圓德公孫。以寶曆四年<sub>甲</sub>四月。生於鍛治橋本邸。安永二年<sub>巳</sub>十一月爲本源公嗣。襲封。十二月叙從五位下。任淡路守。後遷上野介。在職三十一年。歸藩者六。享和三年<sub>亥</sub>十月卒。年五十。葬天德寺。

第八世德壽公。諱直寬。小字麟三郎。又掃部助。後改主稅助。本源公長子。母妾佐野氏。以天明三年<sub>卯</sub>六月。生於四谷本邸。享和三年<sub>亥</sub>十二月。爲本覺公嗣。襲封。叙從五位下。任

大藏少輔。尋任佐渡守。後又遷宮內大輔。叙四品。嘉永三年<sub>庚</sub>十月。准城主。在職四十八年。歸藩者二。卒。年六十八。葬天德寺。

第九世成德公。諱直諒。小字大助。德壽公嫡子。母夫人內藤氏。能登守政韶女。以文化十四年<sub>丑</sub>十月。生於四谷本邸。弘化四年<sub>未</sub>十二月。叙從五位下。任佐渡守。嘉永三年<sub>庚</sub>十二月。襲封。在職十二年。歸藩者六。文久元年<sub>辛</sub>七月卒。年四十五。葬廣瀨成安寺。

第十世正四位。公名直己。小字盛吉。德壽公第十四子。母妾安達氏。以天保三年<sub>壬</sub>二月。生於大窪別第。文久元年<sub>辛</sub>十一月。爲成德公嗣。襲封。十二月。叙從五位下。任佐渡守。明治二年<sub>巳</sub>六月。奉還版籍。任廣瀨藩知事。在職凡十一年。歸



藩者四。四年未七月。因廢藩。爲華族。終永遷東京。自法雲公始封於此。十世二百有六年。而廢爲縣。

山口美道曰。法雲公始受封。闢草萊。治水土。開館列第。實肇造此土。瑞岸公至本源公。繼繼承承。昇平之極。無迹可尋。本覺公英明嚴毅。立法度。定格例。獎勵文武。振興士氣。我藩諸制概成於此時。實爲中興之明君。德壽公寬厚恭謹。通曉典故。閣老逢稟請。至問受佐州之示教否。真守成之良主。成德公精勤。尤愛此土。朝覲歸邑。未嘗愆一期。其不永年。我藩之不幸也。至正四位公。遭逢國家多難之際。散上愛下。改革官職。擴張文武。制度秩然。將有可大觀者。會廢藩而止。惜哉。抑余聞之笠山中村翁。曰。堀尾氏之移城松江也。士庶從徙者。十七八矣。遺民謠之曰。思比與良寸。乃松江賀傳。幾天富田。

波野登奈利山登奈留。當時民情可想焉。而我藩祖封於此。遺民免流離。與扈從士卒同浴仁澤。治教之所及。人不聞狗吠者。二百餘年矣。雖曰時運之所使然。抑亦非陶冶得宜。安能如此乎。嗟其膏澤如是。而方今向鄉人。問列公名字。能舉之者鮮矣。是以姑記其世系。使人有所考焉。至其歷世沿革。余別有藩史。



郡長第三

明治四年辛未七月。廢藩置縣。十一月。遂合嶋根縣。五年壬申二月。劃本郡為十區。廣瀨為之第一區。其七月。改設大小區。置大區署於安來。以管郡內。八月。又改正小區。廣瀨為雲州中第七十四區。六年癸酉一月。廢大區。十二年己卯一月。新置郡廳於廣瀨。以統治全郡。今舉歷代郡長履歷如左。

第一世 矢野勉 嶋根縣出雲國廣瀨人。明治十二年己卯一月。任能義郡長。賜月俸三十圓。十六年癸未一月。陞三十五圓。十七年甲申四月。請罷。嶋根縣屬若槻散代之。

第二世 若槻敬 嶋根縣出雲國松江人。明治十七年甲申四月。任能義郡長。賜六等俸。十九年丙戌八月。因官制改革。叙奏任官六等。賜中級俸。十一月。叙正八位。廿二年己丑六月。轉仁多大原郡長。嶋根縣兵事課長田中知邦代之。



第三世田中知邦

滋賀縣近江國水口人。明治廿二年己

六月。任能義郡長。叙奏任官六等。賜上級俸。廿三年庚十二

月。轉島根縣參事官。鳴根縣土木課長正木芳介代之。

第四世正木芳介 山口縣周防國山口人。明治廿三年庚

十二月。任能義郡長。叙奏任官六等。廿五年壬一月。叙正八

位。廿六年癸十二月。叙高等官七等。廿七年甲二月。叙從七

位。廿九年丙二月。叙高等官六等。三月叙正七位。卅一年戊

五月。轉邑智郡長。製鍊所書記猪股定重代之。

第五世猪股定重

椽木縣下野國大田原人。明治卅一年

戊五月。任能義郡長。叙高等官八等。八月叙正八位。十二月

轉那賀郡長。島根縣第一課長山本良次郎代之。

第六世山本良次郎

鳴根縣出雲國松江人。明治卅一年

戊十二月。任能義郡長。叙高等官八等。

#### 舊藩文武第四

法雲公以來數世。文武制度不詳。蓋概不過各自勉勵耳。至本覺公。興學校。設武場。或聘教師於宗藩。或遣藩士於四方。銳意專心。振起一藩。輔以片山義章朝比奈定安寬濟父子。相與鼓舞之。於是乎文武之道大開。爾後世世相承。益擴張之。我藩學藝始有可觀焉云。

#### 皇學

明治三年庚八月。正四位公諭藩中以皇學之要。以細野洞貝掘重雄。假爲訓導。以教子弟。洞貝學於杵築千家清主及尊孫。重雄初學於清主。後學於麾下士林國雄云。

#### 漢學

享和元年辛三月。本覺公徵海野彬之於宗藩。爲句讀教授。始



起斯道。後爲教授。文化五年辰十二月。德壽公又徵宗藩士山村良顯。爲句讀助教。以輔彬之。後又爲教授。彬之初學於宗藩桃源藏。後學於古賀煜。又嘗入昇平校。尋游於京師者五年。主折衷學。良顯學於源藏。子世明。專奉程朱。良顯子良純。孫良行。與岩碯澹前後並爲教授。澹游於大坂。入藤澤輔塾。良行初受家學。後學於鹽谷世弘。又問詩大沼厚云。山中幸武者。從學山村良顯。後入林氏門。爲都邸教授。嘗著小學合璧。行於世。

### 洋學

明治三年庚午十一月。正四位公以藩士鶴飼正孝。爲助教。明年以其羸病。以岩碯茂。代爲英學助教。正孝學於箕作麟祥。茂學於麟祥及福澤諭吉。

### 醫學

天保十五年辰甲八月。德壽公命儒學教授山村良純。兼督有志之徒。至明治三年庚午五月。正四位公以三刀甫並河元弘。岡田令望及長岡圭齋。爲訓導。教子弟。甫於京都秋吉雲庵。元弘於大阪田中內記。令望於大阪熊本道可。圭齋於飯石三刀舜朔。及大阪森川元道。學焉。

### 算術

文化六年己巳。德壽公命藩卒森山盛長。教子弟。而尙寥々。不過一家塾。明治三年庚午十一月。正四位公新設學校。以朔晦正誼。爲教授。盛長學於宗藩多多納忠三郎。正誼又學於盛長。

### 習字

明治三年庚午十一月。正四位公以藩士柳田長親。爲教授。長親



為市川三亥高足。

兵學

安永九年庚子七月。本覺公以藩士長會長道。為山鹿流師範。丙  
藤高朗繼之。笠山翁曰。又有今泉不存山鹿。流家塾。世繼內藤高朗者乎。寬政七年卯乙八月。  
命森山定志。更教授甲州流。爾後門流相承。至明治三年庚午用  
洋式。而廢。定志初學於長道。後從學於東都松宮定俊。

弓術

寬政六年甲寅八月。本覺公以藩士官脇信篤。為伴道雪派師範。  
以教徒弟。信篤受業於宗藩篠原九右衛門。後教官相傳四世。  
至明二年己巳五月而廢。或云寬文中藩祖似未可信。為日置流師範云。

馬術

寬政六年甲寅正月。本覺公以藩士山崎勝定。為新八條流師範。

教授子弟。勝定出於宗藩矢島金麟門。後教官凡四傳。至明治  
三年庚午而廢。或云安永中本覺公命矢野久助教子弟云未詳。  
天明五年乙巳。本覺公以小念重較。為新八條流師範。教授於都  
邸。

槍術

寶曆十一年辛巳十二月。本源公徵仙田重處於宗藩。為一指流  
師範。重處受業於宗藩永野道武。後凡七傳。

劍術

享保十年乙巳二月。圓德公以藩士岩崎茂敦。為一知流師範。笠  
翁疑為私社。余亦初為然後觀岩崎氏系圖。及元教授子弟。  
文元年藩中失火。延燒劍術場。而後始知其不然。教授子弟。  
安永六年丁酉四月。本覺公命槍術師範仙田重處。教授不傳流。  
重處學於宗藩市川正峯。後凡七傳。明治元年戊辰七月。正四位



公又創一刀流。命藩卒波多野友江市川新六田邊要三郎佐久間耕三郎。督生徒。

### 銃砲術

寬保元年辛酉十月。瑞雲公以藩士熊谷武嘉。爲小谷流師範。武嘉嘗就其食客鳥取藩浪士會見算卜者。受業云。後五傳至明治三年庚午。以西洋砲術代之。

山名範之者。後學於溝口卜外。文政中德壽公命督步卒銃術。稱之步卒指南。

### 柔術

延享二年乙丑閏十二月。瑞雲公以藩士太田方命。爲直信流師範。或以爲延寶係藩祖之時者大誤不詳其所受。後其傳中絕。後世長會長順受業於宗藩梶川淡水。而通其技。因命督有志之徒。

柳田長親者。受起倒流於麻橋藩比留川彥九郎。遂爲都邸教授。

### 拳法

寬政十年戊午九月。本覺公始起此技。尋以藩卒若林昌則爲一覺流師範。昌則受業於宗藩松崎昌奐。後凡三傳。

### 洋式銃隊

慶應三年丁卯正月。正四位公聘宗藩士三谷宇八森關彌內田與一郎及木造三郎。傳習洋式銃隊。先是。既採用其術。或命吏誘導子弟。或遣士卒。傳習其技。而未備。至是其法大備。後悉廢諸武術。而專行之。以時勢之變遷也。

美道曰。右文武原始。略如此。就中文則漢學獨盛。武則槍劍尤行。故知名之士。亦不乏焉。及後世文分爲和漢洋。武合爲



洋式銃隊。亦時勢之所使然。而皆未至見成功而止。

### 今世公私學館第五

維新前。諸藩各異學規。無復定制。明治五年<sub>壬申</sub>八月。朝廷頒學制。始一定全國之制。十二年<sub>己卯</sub>九月。廢之。新布教育令。定諸般規條。十三年<sub>庚辰</sub>十二月。一改之。十八年<sub>乙酉</sub>八月。再正之。十九年<sub>丙戌</sub>四月。施行大中小學校及師範學校令。以一新學制面目。二十三年<sub>庚寅</sub>十月。更頒布小學校令。細定規條。以至今日。我鄉常奉此旨趣。改正學事。以教子弟云。

### 尋常小學校

明治六年<sub>癸酉</sub>十一月。始起小學於藩學舊舍。以山村良行<sub>等一</sub>三澤爲吉<sub>等四</sub>宮脇小野右衛門仙田重玄內田護藏<sub>等共五</sub>爲教官。九年<sub>丙子</sub>五月。文部省中督野村素介。巡察第四五大學區。其四大學區中。以我島根縣爲首位。且評我校曰。維持文運於僻境。



其勢駸駸將凌駕國縣。終爲贈額面一葉。特表之。爾來校名有變更。學區有改廢。職員進退亦隨而不一。二十二年<sub>己丑</sub>八月。新建築校舍。落之。二十四年<sub>卯辛</sub>一月。賜教育勅語。曆本。二十五年<sub>辰壬</sub>十二月。拜戴復寫。御影。二十九年<sub>申丙</sub>五月。舊藩主松平老公。親書邦家之基字。賜之。方今登降子弟。殆三百人。

### 高等小學校

明治二十年<sub>亥丁</sub>十一月。以廣瀬興產會場。假充校舍。以創此校。能義郡書記岡田令望。兼爲校長。無幾。內藤新代之。明年<sub>戌子</sub>九月。以新築校舍成。落之。而移焉。二十三年<sub>庚寅</sub>六月。拜戴。兩陛下御影。二十四年<sub>卯辛</sub>一月。賜教育勅語。曆本。二十九年<sub>丙辛</sub>四月。賜征清役之捷器。<sub>十九種四十一品</sub>其五月。舊藩主松平老公。親書義勇奉公字。賜之。抑本校。因郡情分裂。存廢不一。初成於全郡九

十六町村聯合。尋縮小爲六町村。後又減爲五町村。區域愈狹。而校基却確立。方今登降子弟二百餘人。其盛倍他日。

### 修文館

方今姑  
閉館

藩制之時。爲儒學教官者。概有家塾焉。而近世尤盛者。爲修文館。修文館者。舊藩學之名也。明治七年<sub>甲戌</sub>九月。山村良行始設爲私塾。繼承其名。以教授皇漢學。二十年間。入其門者。殆二千人。隱然維持道德文章於一方。十七年<sub>甲申</sub>十二月。朝廷特賜視函及康熙字典。二十四年<sub>卯辛</sub>一月。賜教育勅語。曆本。舊藩主松平老公。又屢賜物賞之。



技藝第六

畫工

掘江精一。號友聲。幼學北畫於山本探淵。又嘗繼海北氏。後歷遊東西諸州。常慕宋元明諸大家。及圓山應舉柴田義董之筆意。專主寫生。着色殊妙。嘗寫聖護院官盈仁法親王生影。供天覽。又在長州及丹後宮津。俱受藩主優遇。嘉永五年壬子正月。應成德公之徵。來仕廣瀨。名聲振宇內。

木工

石本浪五郎。號水月。就木匠渡邊佐助及茂十郎者。受業。極其精妙。嘉永五年壬子應成德公之徵。來仕廣瀨。工名振傍近。

金工

梅木與吉。廣瀨人。嘉永六年癸丑傳習刀劍諸武器製法於鄉人。



春田宗義。後從事金銀工。

陶工

矢野忠統後改矢泉廣瀨人。天明六年丙午閏十月。以本覺公之命。為陶師。初八幡宮神官竹矢豐前。使作州人吉五郎者。起窰於社境。製造陶器。不<sub>レ</sub>良。乃更雇長州人理兵衛為松江堅坊筆者。工與吉發埒者。繼之。漸製出諸器。至此有是命。忠統遂往家焉。其子忠篤又繼之。以勤勉從事。屢蒙賞。文化二年乙丑四月。忠篤安置自製十六羅漢像於洞光寺。不動尊像於岩倉寺。其不動尊像。一日無故而顛碎。人以爲異云。

鋸工

距今八九十年。鍛工橋根組右衛門。學技於京都。而歸。以當時除三府之外不許製造。乃托言修繕。製之者數十年。至維新之

際。其子次郎右衛門始公然開業。至今日。其業頗盛。

織工

長岡貞子。廣瀨人。爲坊醫謙祥之妻。文政中。嘗受<sub>レ</sub>紵織於伯州米子而歸。是爲我鄉紵織之嚆矢。爾後受業者。漸多。至弘化嘉永之際。殊盛。至近歲。內設共進會。以獎勵技術。外輸於博覽會場。以擴張販路。或遣人視察各地。且改製機器染織之法。其技漸巧。其實漸強。遂爲鄉產之最。

乾菓

嘉永之初。市商村上谷平。創製名菓。曰吐月糖。以其地富於花月之勝。以月爲名。以花爲紋。其味淡然。如春花一散無迹云。谷平當幕府禁絹帛之際。以紙製婦人首飾。輪出於四方。頗致國益云。



髮膏

寶歷三年<sub>酉</sub>四月。市商市川祖左衛門。創製良膏。天保之初。其裔喜左衛門。經歷諸州。徧訪同職者。折衷取舍。大革製法。其所謂君衮袖。鬚乃梅者。光澤清香。殊異他云。

附記

製糸

明治二十二年<sub>己</sub>七月。創廣瀨蠶業會社。初舊藩主松平老公。賜產資金一千圓於舊藩臣也。藩臣中分爲二。曰興產會。曰桐園社。分立營業者數年。寥寥不振。至是合兩者。且別合政府所貸之金二千四百二十一圓餘。充資。以起業。會老公來慨士族漸陷困窮。將自投資起蠶糸場。相與益此鄉。乃定議爲聯合業。矢野勉瀧正和。相繼當之。二十三年<sub>庚</sub>六月。設製糸傳習所。購

蠶繭。養工女。遂輸送其製糸五函於橫濱。是我鄉輸出之始也。爾來相繼營業。漸擴張之。改築工場。新設蒸氣器。三十年<sub>丁</sub>一月。創器械製糸。以至今日。

美道曰。文武技藝。特叙其起原。使人知所由。至其人之詳傳。與其事之盛衰。則待他日之選云。



社寺第七

鄉社

富田八幡宮

廣瀨之南。勝日山有鄉社。曰富田八幡宮。境內頗廣。當其奧區。平地中央。巍然高聳者。爲本社。祭譽田別尊。左右配以天照皇太神與神功皇后仁德天皇。殿棟宏壯。彫刻精巧。不假丹碧。而益可景仰焉。實古來十三村宗社。而世世城主之鎮也。南傍有武內神社。神社右後有大社。本社左後有勝日神社。有寶庫。有神樂所。有神饌所及樓門。下樓門。則有石甃。長數十百間。石甃盡處。左方有二社。曰稻荷神社。曰酒解神社。其下有須賀神社。祭素盞鳴尊。稻田姬。五男三女神。祭式尤盛。其他子社尙多。世傳。往昔本社在月山上。勝日神官感於靈夢。而創建焉。中古平



氏將惡七兵衛景清。爲我州之宰。將城於山上。以其有神。庶不  
便築城也。乃禱曰。謹將移神廟。願以矢之所達爲占。乘夜向空  
而射。矢軼數百步。而穿一松樹。乃因其地勢。而經營奉祀者。見  
今之社境也。境內古木蒼鬱。風致閑靜。尤爲靈地。

村社

都辨志呂神社

在目谷。祭素盞鳴尊岐戸神。風土記所謂都俾志呂社。延喜式  
所謂都辨志呂神社是也。往昔在鍛冶坊。寬文八年戊申移今地  
云。

嘉羅久利神社

在宮尾。祭素盞鳴尊。五十猛命。往昔在廣瀨坊。寬文八年戊申移  
今地云。

大藏神社

在祖父谷。祭素盞鳴尊。大藏神。

金刀毘羅神社

在下組。祭金山彥命。素盞鳴尊。顯仁皇命。大己貴命。

勝日高守神社

在月山上。祭大己貴命。風土記所謂加豆比高守社。延喜式所  
謂勝日高守社是也。

少童神社

在牧谷。祭表筒男命。中筒男命。底筒男命。往昔稱瀧神社。寶曆  
十年庚辛改今名。

十二所神社

在新宮。祭伊弉册尊。速玉男命。事解男命。往昔稱熊野新宮十



二所權現。後改今名。以其在月山良位。世世城主。皆以為北門之鎮云。

廣鳴神社

在町帳。祭素盞鳴尊。澳津彥命。澳津姬命。往昔稱三寶荒神。後改今名。

無格社

稻荷神社

在舊城內。祭倉稻魂命。

山神社

在目谷。祭大山祇命。

美加佐神社

在妙現丁。祭倉稻魂命。往昔稱妙現神社。明治四年庚午八月。改

今名。

金屋子神社

在目谷口。祭金山彥命。為天保年中之創立。

大夫神社

在新宮。祭尼子政久。為天文二十三年甲寅十一月之創立。

小山神社

在新宮。祭譽田別尊。舊稱應神天皇社。明治三年庚午改今名。

蛭子神社

在中坊上坊兩所。祭蛭子神。大己貴命。事八十神。舊稱惠美須社。明治三年庚午改今名。



寺院

金華山洞光寺

在鍛冶坊後。祭釋迦如來。為禪宗曹洞派。相傳。往昔在備後高野山金尾。後出雲守護代尼子清定。移寺於本州富田。以僧大拙伯耆倉吉定光寺主。延德二年九月朔。寂。為開祖。以為其塋域。寬永中僧旨徹第八世。移寺今地云。

明星山勝願寺

在新市坊後。祭阿彌陀如來。為真宗本願寺派。創立事歷不詳。中古東本願寺僧教如。嘗留錫於本寺者三年。以故姑屬東本願寺。享保六年辛丑。僧惠海。歸依本願寺僧良如。復舊云。

寶積山蓮教寺

在新市坊後。祭阿彌陀如來。為真宗本願寺派。往昔為真言宗。

慶長十三年戊申。僧了賢受本尊寺號於本願寺僧准如。改宗云。

雲龍山成安寺

在管谷。祭聖觀音菩薩。為禪宗臨濟派。正和中開。基於僧源翁。古在廣瀨坊。及寬文八年戊申。松平氏新構館。更賜地於新宮尼子氏舊邸。明治十九年丙戌。避水火之難。重移今地云。前面小丘。有成德公墓。灑掃不怠。為舊藩臣之所崇敬。

附記

瑞雲山總持寺

祭地藏菩薩。以僧古愚為開祖。往昔在下山佐。寬延三年庚午。六月。城安寺僧西州。請松平氏。移新宮。而今則城安寺兼攝之。以其為貧小也。

洞雲山宗松寺



在町帳。祭釋迦如來。爲禪宗臨濟派。以僧意巖貞治元年八月三日寂爲開祖。

睡虎山岩倉寺

在鹽谷。祭聖觀自在菩薩。爲真言宗。神龜三年丙寅開基於僧行基。往昔在山佐高氣山。文治中僧高顯移寺於今地。而中興焉。有一庵。曰常念佛。祭阿彌陀如來。爲寶曆元年辛未之創立。其他行者堂。金毘羅堂。大師堂。地藏堂。六角堂。大子堂。辨天堂。兒守堂。仁王堂。雷尊堂等。散在各所。山內高燥。富風致。

本然山普願寺

祭石原。祭阿彌陀如來。爲淨土宗。創立開祖不詳。後世以中興僧滿界天正十九年辛卯寂爲開祖。

啓運山本成寺

在石原。祭釋迦如來。爲日蓮宗。以僧日新文錄二年八月十一日寂爲開祖。

清水阪寺

在祖父谷。祭觀音。

十王堂

在下坊。祭藥師如來。

一條院

在中坊。

美道曰。鄉內社寺亦多矣。而經年所之久。概有火災。以故不能詳其終始。今據社寺明細簿者。而時加所見聞如此。其子社小堂。則不暇悉記云。



勝跡及古墳第八

月山

富田有古城蹟。曰月山。蓋以山在震位。常吐月。名焉。即古之勝日山也。山上有小社。曰勝日高守社。祭大己貴命。見風土記及延喜式。或傳上世山麓皆海。神代卷所謂。命認神光於海上者。是也。及後祭譽田別尊。以其邦讀相近。遂稱此土曰富田。是其所以有富田月山之名也。屹立數百仞。左右如削。登路有三。曰菅谷。永祿八年四月小早川隆景向之。尼子春元長父子。日岩倉。毛利元就。輝元攻之。以其半腹以上頗險峻。屈曲通路。前面有七曲之稱。山巔則平坦豁如。長於東西。而短於南北。北對龍山京羅綺山。西臨三笠山。東南有大連吉田諸山。三面皆山。而獨東北平曠。遙控內外海。當時之雄風可想焉。自惡七兵



衛景清始城於此。而後常置治焉。至尼子經久起。大擴張規模。牙城高聳山上。設二城三城。菅谷爲正門。鹽谷爲後門。別有御子守蓮池諸門。繞以屏牆濠塹。大小第宅。羅列山下。市街之長。殆至安來岸云。雖子孫陵遲。漸屬衰滅。尙能支七歲之久。賴子所謂。尼子氏先世之得道。其餘烈若此。不其然乎。蓋四百年於今矣。霸圖悵已矣。丘陵盡喬木。空使明月孤映。可勝歎乎。有花壇太鼓壇千席館及古井洞穴遺趾。瓦片灑透。殘壁起伏。肅然襲人。逢霖雨崩壞。則往往有折戟殘劍及古器發出。人爭珍藏焉。藩制之時。俳人野津南谷等。追懷之餘。大種植櫻樹。爛熳清艷。爲一大公園。遠近來觀焉。既而有故。悉罹斧斤之災。豈山靈不欲爲風塵所汚乎。要之。以爲神世以來之靈地。而七歲衛城之跡也。自西自東自南自北。來訪者常無絕云。嗟夫戰國之時。

龍爭虎鬪。何地無城壁。而其能不屈不撓。如我月山者。果與有幾。亦足以知景清經營之精。而尼子氏得人之深矣。余獨悲永州之勝。遇柳州而著。赤壁之墟。遇東坡而著。耶馬溪之於山陽。月瀨之於拙堂。皆得其人而名著於天下矣。今有此偉蹟。苟遇若數子其人者。則山蹟昭昭。將與此月並照。聊記所見聞。以待其人云。

附記

世傳源平氏之時。惡七兵衛景清。爲平氏。始城於此矣。後世守護多居焉。文治元年乙十二月。源賴朝以隱岐守佐々木義清。爲出雲隱岐守護。是我州守護之始也。其子信濃守泰清嗣。有十一子。其第二子晴清居隱岐。稱隱岐氏。第三子賴泰居鹽治。稱鹽治氏。第四子義泰居富田。稱富田氏。自是佐



佐木氏族。遍於國中焉。賴泰嗣。稱三郎左衛門。其子近江守  
貞清。其孫檢非違使兼隱岐守高貞。父子相繼。高貞之讒死。  
足利氏以二州。賜於檢非違使兼佐渡守高氏。高氏者。義清  
之兄定綱六世之孫也。於是。以州人吉田嚴覺。為目代。監諸  
政焉。已而山名時氏自奪之。遂嚴覺。以州人富田秀貞。義泰之孫  
代為目代。時氏二子右衛門佐師義。伊豫守時義。兄弟相及。  
師義之子。播磨守滿幸。承時氏之後。以州人鹽治師高。蓋高貞之裔  
為目代。既而滿幸叛。足利氏被捕殺。足利氏以治部少輔  
京極高詮代之。高詮亦佐々木氏。高氏之孫也。以隱岐秀重  
蓋時清之裔為守護代。尋以尼子持久代之。高詮之子三郎左衛  
門高光嗣。高光二子治部少輔持高。太膳大夫持清。兄弟相  
及。守護代持久子清定嗣。不納租稅於本國。持清怒逐之。以

鹽治掃部介代之。持清卒。子治部太輔勝秀嗣。尼子清定漂  
流而死。其二子伊豫守經久。下野守義勝。常深憤之。以文明  
十八年。丙午正月。遂攻滅鹽治氏。平定國中。漸征服傍近。至大  
永中。其所管跨十一州。雄視於中國矣。至其孫修理大夫晴  
久。曾孫右衛門督義久。頻為毛利氏所攻。永祿九年。丙寅七月。  
義久遂出城降。毛利氏乃命其將天野隆重。假守富田。既而  
元就子少輔十郎元秋。大藏大輔元康。兄弟相次來鎮之。天  
正十九年。辛卯六月。藏人頭吉川廣家居之。領出雲伯耆數郡。  
慶長五年。庚子十月。德川氏削毛利氏封。尋封帶刀先生堀尾  
吉晴於出雲隱岐。傳之其子出雲守忠氏。孫山城守忠晴。初  
忠氏以此地有銃丸之患。有移城之志。未果而卒。吉晴欲成  
忠氏之志。遂決意移之松江。今之龜田山千鳥城即是。實慶



長十六年<sup>辛亥</sup>也。自景清築城。凡四百五十餘年而爲墟焉。美道曰。節山桃子曰。出雲之爲國。歷國造國司。至守護。始以其國爲國。自專其政。雖然。佐々木氏至京極氏。或別有本國。或身在鎌倉及京師。遙置目代。以監之。是以君臣之体未定。而忽得忽見奪。至尼子氏。始據以爲根抵。而漸廣近隣。雖曰領出雲之成者。其可也。此論先獲我心矣。若夫其人之正邪。曲直忠奸賢愚。與成敗存亡之跡。則具存史編。非今之所言也。

### 矢中松

八幡境前道左。有一松樹。築石方二間許。周以木柵。世傳爲景清矢之所達。稱曰矢中松。天保六年<sup>未乙</sup>二月。舊藩士森山定志建碑於松下。以表之。當時。朽幹尙存。而今也則亡。其有之者別

種也。僅僅六十年。碑亦將毀損焉。余深哀之。而復恐使後人復哀之也。傍有清泉。石函貯水。源泉混混。不舍晝夜。水尤清冽。雖大旱。無復涸乾之憂。夏夜。鄉人多洗熱於此而歸。嗟此水也。若使在京阪東都。則其劇賞何如乎。今棄此地。獨不過爲田夫野老所賞。亦可謂不遇哉。

### 天馬鼻

廣瀨之北端。曰天馬鼻。建武元年<sup>甲戌</sup>五月。出雲守護鹽冶高貞。獻天馬。馬赭白。長四尺三寸。富田距京師七十六里。以卯發。酉而達。此蓋天馬之所發云。

### 附記

世傳。往昔此地有深淵。曰天馬淵。大鱗魚棲焉。屢出害人。遂至傍近絕來往。半上行景聞之。曰古者弄斷脩蛇。古冶子殺



龜。吾亦斬此妖。以除民害。乃甲冑游泳。漸至淵。則鱗魚呀然而吞之。行景拔刀。極力刺口中。鱗魚跳出水。顛轉狂回而死。行景自是稱姓鱗魚上。後又改半上云。

蛇巖

廣瀨之南端。飯梨川西岸有一大巖石。曰蛇岩。其下水匯瀦爲深淵。世傳大蛇棲焉。而以其多流泥砂。年埋於一年。余少時尙見其岩石。而今則不啻沒淵。不復見岩石。桑海之變。古今同然。不知當時之大蛇果何去。

附記

史稱。往昔尼子氏臣有真木上野介者。勇悍善射。一箭貫倒二人者數。嘗聞飯梨川上。山佐鄉多鹿。携弓矢。深入山谷。踞岩石。爲鹿鳴。忽有巨蟒。躍出山上。頻掉毒舌。上野介走。蟒追

之。勢如疾風。上野介過一折路。急引滿注大箭。蟒出。乃發。又過一折路。注第二箭。以待。不至。乃走還。與其父及家人。往見。箭入自口。貫脰而倒。周三圍。長過七丈云。按所謂蛇岩。在山佐境上。或上野介射蟒之地。

經塚

蛇巖之上。有一山。山巔叢樹下。建一小碑。題曰經墓。明德應永之際。近江人尼子持久。爲出雲守護代。來居富田城。領七百貫。嘗自膺寫一切經。埋之城西山上。以贖子孫之承福。蓋倣京師將軍塚者云。

尼子經久墓

搯谷路傍。一松樹下。有五輪塔。高五六尺許。蓋豫州經久之墓也。或以爲合葬其父清定。而清定爲京極氏所逐。漂流而死。則



其墓似不當在此。傍有十個小石。又不可知其為何物。荆鎮昔  
經。往時之英風。果何在。古詩所謂。城月松千尺。功名土一丘。殆  
爲此墓言。

### 新宮黨墓

新宮一丘樹間有小碑。或云新宮黨墓。別有一小社。曰大夫社。  
蓋因國久父子四人。皆稱大夫。而名者。國久初稱式部大夫。長  
子國久稱式部大夫。三子嘉永六年。安村民建一碑。題曰新宮黨  
子敬久稱左衛門大夫。嘉永六年。安村民建一碑。題曰新宮黨  
靈社。嗟當國久父子在此地。勇卒三千人。爲一城藩屏。敵軍懼  
之。暗主自用。自壞長城而不悟。悲夫。

### 堀尾吉晴墓

岩倉寺境內。常念佛堂前。有一大碑。世傳爲帶刀吉晴之墓。吉  
晴卒。在移城之後。而以其尙日淺。終歸葬於此乎。抑或富田遺

民。追懷之餘。爲建碑於此。以招其靈。所謂招魂墓者耶非。

### 堀尾忠氏墓

在新宮一小山上。石壁擁三面。長六七間許。內有二三石。半沒  
地。蓋爲墓碑礎石者乎。荆棘塞路。殆不可登。山麓有田一區。稱  
忠光寺平。忠光寺者。雲州忠氏釋號也。

### 毛利元秋墓

在町帳宗松寺境內。藩制之時。毛利氏每其五十回忌。令使者  
來供香資銀代拜。

### 堀尾河內守父子墓

在月山山腹。稱親子觀音。或謂埋河內守父子首級。或謂葬尼  
子氏戰死之士。未知孰是。

### 附記



堀尾吉晴之移城松江也。命族河內守。護孫小太郎。留守富田城。自往督工事。河內守娶忠氏之妹。生男。曰掃部。年已十五。以小太郎幼。且妾出。欲廢而代以掃部。屢使其妻因母請之吉晴。不許。於是遂欲殺小太郎。幽之深室。禁近士出入。獨保母及乳母侍傍而已。當是時。圍城士卒皆從工事。在者近士二三人。及鎧仗工十餘人而已。保母就河內守侍女。探其情。乃密與近士及工人謀。一夜乘風雨。遂奪小太郎。踰垣而逃出。衝暗踰駒返。卽夜達末次。吉晴乃托小太郎於族采女。流河內守父子於隱岐。尋賜死。實慶長十三年申十二月也。

#### 品川大膳墓

下組後。有一碑。世傳爲品川大膳之墓。而新宮亦有其墳。未知孰真。

#### 附記

大膳石見人。長殆六尺。膽力過人。永祿八年乙九月。毛利氏攻富田。陣河西。大膳從在陣中。奮曰。吾聞尼子氏有三傑。山中鹿之助。幸盛。爲之最。我能獲之。則其功偉矣。蓋聞鹿食械實。墮角。而狼能陷鹿。乃自稱械木狼之助。勝盛。一日見赤甲鮮明。戴鹿角。胄者。知其幸盛也。隔川自名。插弓箭而涉。幸盛亦涉。秋上久家在傍。呼曰。持長兵。何怯也。勝盛爲不聞而進。久家射絕其弦。勝盛乃投弓箭。二人鬪洲中。不決。乃各投刀角鬪。勝盛手搏幸盛。伏之。幸盛急拔刀。自下刺之。蹶起。獲其首。呼曰。出雲鹿。獲石見狼。敵軍怒而來戰。我軍擊却之。嗟夫。幸盛之忠勇義烈。天下稱之。今不當祭者。祭之。而當祭者則不省之。豈不誤乎。

#### 石室



在鹽谷口崖側。明治廿七年甲午九月始發掘之。排石門而入。有洞穴。高五尺。廣袤六七尺許。右側有石室。屋長五尺。幅三尺。高四尺許。內有朽骨及古劍一口。陶器數品。以其爲秦氏所有。持歸達之官。未知爲何人之墓。

美道曰。以我鄉爲百戰之地。舊跡極多。如其古墳古穴。不暇數。而概不可識。余特記其著明者如此。

### 戶口第九

嗟戶口之增減。足以察土壤之盛衰。國計之伸縮。古人式貢版者。良有以也。今雖不詳我鄉創造之戶口。試據當時士卒給祿簿。與富田街移轉簿。而概算之。如得凡三四百戶。一千五六百人者。爾來雖時有出入。漸漸增加。至維新之際。移在府士卒於邑。而極矣。後又漸減。以至今日。今隨年代錄之。使人有所考焉。

享保十七年壬子

二千七百二十九人

明和八年辛卯

二千六百九十四人

安永元年壬辰

二千六百三十六人

弘化三年丙午

三千四百三十人

嘉永五年壬子

三千四百七十七人



同三十一年	同三十二年	同三十三年	同三十四年	同三十五年	同三十六年	同三十七年	同三十八年	同三十九年	同四十年	明治五年
子戊	丑己	寅庚	卯辛	辰壬	巳癸	午甲	未乙	申丙	酉丁	壬子
七百七十一戶	七百七十一戶	七百七十一戶	七百七十一戶	七百七十一戶	七百七十一戶	七百七十一戶	七百七十一戶	七百七十一戶	七百七十一戶	九百三十九戶
三千五百九十三人	三千五百九十二人	三千五百九十八人	三千五百七十二人	三千五百六十八人	三千五百三十三人	三千四百九十八人	三千四百四十八人	三千四百四十八人	三千四百四十八人	三千八百七十七人

右市街戶口如此。舉其係當時區域者。則如左。

同三十一年	同三十二年	同三十三年	同三十四年	同三十五年	同三十六年	同三十七年	同三十八年	同三十九年	同四十年	明治五年
子戊	丑己	寅庚	卯辛	辰壬	巳癸	午甲	未乙	申丙	酉丁	壬子
千四十七戶	千四十七戶	千四十七戶	千四十七戶	千四十七戶	千四十七戶	千四十七戶	千四十七戶	千四十七戶	千四十七戶	千四百四十八戶
四千七百八十一人	四千七百四十九人	四千七百七十七人	四千七百四十八人	四千七百六十八人	四千六百五十四人	四千六百一十一人	四千六百七十七人	四千六百六十七人	四千六百六十七人	四千七百六十八人

除富田如此



雜事第十

古川温泉

古昔古川村有温泉。在伊布夜社側。寬永中高真公來浴焉。後飯梨川水路轉移。遂亂迹。元文四年己未三月。藩醫岡田元杏。請松平氏修補之。乃掘地防水。易桶架屋。苦慮從事者數年。初頗如得良蹟。終不可爲而止。惜哉。

銀礦

寶曆十一年己辛巳六月。江州八幡人仙七者伊勢清兵衛者來察鹽谷有銀礦。請松平氏雇礦夫。就而採掘焉。隨鎔解之。漸得良蹟。至八月。獲礦土凡九十擔。致之於其國。其直七十一貫七百錢云。美道曰。前焉有鑿牧谷湯氣原及山佐賓谷之金穴。後焉有掘駒返山之銀礦。皆不至得良蹟而止。嗟是果無之耶。抑未



得其方耶。安得雇良工重試之。

### 享保狂狼

享保十七年甲寅正月二十三日。狂狼跳出市中。殺傷男女十有五人。此日白丁甚助者。自實松村返。至石原村。會狼豨突至。直拔刀斬其右目。又深斬眉間。狼不屈。躍嚙甚助之面。甚助倒。狼返。又至市中。縱橫馳突。洗疵於十王堂川。狂奔入軒家坊。七兵衛七郎兵衛平六清右衛門安右衛門叢槍遂殺之。以七郎兵衛功尤大。特賞之。後以狼又屢出。命步卒數人。携銃獵之。既而以其出愈甚。人不夜行。命卒長鵜飼政行部下。每夜自成至亥放空砲於郭外五所。警戒之。如此者。凡二十餘日而止。

美道曰。按記。是後天明六年丙午五月。有古川太平寺。以狼數出窺牛馬。請放砲警戒之。文化五年戊辰五月。有狼陷籍下山

佐田圃。不啻狼。元文二年丁巳二月。下山佐民獲熊。寬保二年壬戌十一月。菅澤民亦獲熊。因是觀之。古昔傍近山中。此等諸獸亦多矣。而今也則亡。蓋隨山野之開。漸遠跡也。

### 寬政大火

寬政二年庚戌三月二十日午牌。新市坊失火。偶東風大起。火勢颺疾。須臾燒盡。鍛冶坊魚坊。入藩中。掃蕩鈴木片山矢野諸大宅。及中丁北部。目谷諸士邸宅。而遂及公館。凡郭內武庫倉廩樓櫓連房觀馬亭等。悉爲灰燼。火勢益加。西南盡石橋祖父谷。東至白丁連房而止。而餘火遙迸於八幡境內。本子社拜殿樓門等。又悉燒盡。至翌未牌。而僅得鎮焉。幸不傷人畜而止。報至都邸。本覺公首問曰。武庫何如。對曰亦不免。公悵然者久之云。其害如左。



一公館 一觀樓 一觀馬亭

一假邸 一作事所 一報鐘樓

一劍術場 一倉庫 二 一連房 六

一士卒邸宅 六十八 一商戶 九十七

一農家 八

一八幡社 本社拜殿樓門神樂所 子社 四

今試舉延燒及十戶以上者如左。

一延寶六年<sub>戊午</sub>正月十五日魚坊失火。藩中除祖父谷上部市

街除一乘院以北之外悉燒蕩云。

一元文元年<sub>丙辰</sub>四月七日白丁連房失火延燒中丁二十三戶。

一延享元年<sub>甲子</sub>九月二十六日上坊失火延燒五十五戶。

一寶曆十一年<sub>辛巳</sub>三月二十七日上坊失火延燒士宅六商戶

二百四十二。及佛堂二。倉庫十三。牢獄一。

一明和六年<sub>己丑</sub>六月十七日洞光寺失火。延燒勝願寺蓮教寺。

及新市鍛冶坊五十八戶。

一安永六年<sub>丁酉</sub>六月十三日四軒家失火。延燒十二戶。

一文政十二年<sub>己丑</sub>四月七日上坊失火。延燒二十七戶。

一文政十二年<sub>己丑</sub>四月二十四日下坊失火。延燒七十戶。

一嘉永三年<sub>庚戌</sub>四月二日下坊失火。延燒百二十戶。

享和大雪

享和三年<sub>癸亥</sub>正月大雪。平地踰三尺。山谷至五六尺。先是久無

大雪。禽獸蕃殖。縱橫狼籍。至白日出於家傍。以害禾稼。農人大

苦。至是士民子弟。大獵於山谷。猪鹿飢餓。沒雪不能動。其執之。

如執籠中之鼠。封內諸村。前後所獲之猪鹿。至一千百十一頭。



矣。而藩中及市內所獲。則不在此數云。

一猪十二頭 上山佐宇波兩村

一鹿千三頭 南部諸村

一鹿六十三頭 北部諸村

一鹿三十三頭 去秋以來南部諸村

天保飢饉

天保七年丙申自春互夏。雲霧濛濛。淫雨無暑。入秋頓寒冷。諸穀不實。且雪霰夙至。至有汲湯溫手。而刈稻禾者。當時我藩秋收。概自三萬四五千苞。至三萬七八千苞。時或有上四萬以上。而是歲僅不過二萬一千四百十三苞餘。於是乎士卒之祿。以玄米四合為一人食糧。計口給之。市人則以三合為度。使日就米商購之。後又減為二合。明年穀價騰貴。至米一苞直錢八貫二

百文。概二貫二三百文至五百文一升直二百八文。概六十五至六十四五文大豆二百文。

小豆三百文。庶民或掘葛根。或採草芽木實。而食之。乃發糜救之。諸寺豪戶。亦皆極力助之。僅得免云。

美道曰。先是有享保之蝗。天明之不熟。而莫甚於此歲。故特詳之。嘗聞一古老之言曰。當時為小吏。在市署。偶投餒餘魚骨於窗外。被丐蹂踐而爭之。宛然如群犬相鬪者然。亦足以察其慘狀。嗟可不懼哉。

嘉永地震

嘉永七年甲寅六月十五日。自丑至卯。地震者三。古老皆曰。鄙野所未聞。既而十一月五日申牌。地再大震。家屋屏墻。至大小樹。動搖殆欲顛。人人出避焉。爾後至翌曉。震動凡十餘回。如其亥牌一震。殆不讓初震。是以市民多席於戶外。露宿徹曉。其非今



夏之比固矣。實分封以來所未曾有云。

與利太水

我鄉稱大水。曰與利太水。或曰與利太者人名也。古者飯梨川上流布部村。有深潭。傍多川漆樹。有與利太者。以採樹脂爲業。稍致富。其兄妬之。竊以稻稈製龍蛇。投之潭中。以祈大雨暴至。湯湯蕩蕩。懷山襄陵。終爲未曾有之災。或曰潭中有龍神。人莫敢漁焉。與利太兄弟竊漁之。以致此災。是皆齊東野人之語。雖不足取固。而其說流傳既久。則嘗有此災。則確矣。余閱舊志。其紀大水者不一。而未知孰爲與利太水。或以寬永十二年亥水。充之。卽出雲大水。出雲川東注。飲宇湖之水也。而未知其果然否。姑記以待博雅。抑世之不自勉。而妬人之富盛。竊犯禁而欲千金之利者。不致禍災者鮮矣。可不戒乎。

廣瀨志終

明治三十二年二月十九日印刷 (非賣品)  
全 三十二年三月四日出版

島根縣能義郡廣瀨町大字廣瀨七百六番地

著 作 者 山 口 幸 五 郎

全松江市殿町十五番地

發行者兼印刷者 布 野 勝 太 郎

全番地

印 刷 所 布 野 活 版 所







187

11

廣瀨史

全

025980-000-1

187-11

廣瀨史

山口 幸五郎(美道) / 著

M32

ADC-3566

